



Pè quelli ch'ùn mi cunnoscenu nancu, mi chjamu Marielle Clementi è sò un autrice appassionata. Nativa di Canari in u Capicorsu, campu in Bastia dapoi una cinquantina d'anni. Aghju passatu 37 anni di a mo vita in una carriera di tecnica cummerciale pè Air France. Ma qualchì anni fà, mi sò scupertu una vera passione per a scrittura.

Da quandu mi ricordu, u libru hè sempre statu u mo cumpagnu fedele. I libri sò per mè cumpagni ch'è anu puntuatu u tempu, puntuatu i mo desideri. U mo babbu lighjia assai è ghjè cù a mo mamma ch'è à pocu à pocu aghju scupertu autori di a letteratura classica francese cum'è Maupassant o Zola o ancu Corneille o Victor Hugo ch'ella mi recitava assai spessu fin' à a so morte. M'anu datu u gustu di leghje è di scopre autori novi è novi generi. Aghju tenutu da i mo parenti parechji libri vechji è assai preziosi ch'è mi sò cari. E so pagine ingiallite ispiranu l'odore di u passatu ch'è ùn serà mai più. È tutte 'sse storie anu finitu per dà mi a voglia di scrive è hè di ghjennaghju di u 2020, durante un attellu di scrittura teatrale, ch'è aghju finitu pè truvà a mo strada nova. Aghju capitu ch'è avia bisognu di scrive, ch'è avia un desideriu prufundu di sparte e mo storie cù u mondu. In più di què ci aghju scuntratu autori tercani cum'è Marc Biancarelli, Laure Limongi, Charlotte de Casanova, Alexandre Oppecini è i mo cari Ghjacumu Thiers è Marie Ferranti, ch'è m'anu datu u gustu di cuntinuà è co ringraziu di tuttu u mo core.

Travagliu a matina, dopu pigliu u tempu di cucinà per u mo maritu è i mo figlioli quand'elli sò quì. Simu epicuriani è ci piacenu i piacè di a vita, sparte un bichjere di vinu nantu à i scogli à u tramontu... Quandu scrivu, risentu una certa ghjubilazione, ùn possu più imaginà d'ùn scrive più. Qualcosa di essenziale à a mo esistenza mancherebbe. Ancu s'è ùn averebbe più lettori, pensu ch'è scriverebbe per mè stessu, per u mo piacè. In fatta fine, e storie ch'è scrivu e mi contu soprattuttu à mè stessu è capiscu ch'è ùn sò micca e mo eroine ma ch'è sò un pocu è forse spessu assai di mè. Diceraghju ch'è sò mi ripresentanu, libere, forte, indipendente è sempre pronte à ricummincià, à ribattulà.

"Scrive, hè circà u stranieru in sè stessu" dicit Marguerite Duras...


A scrittura, per mè, hè una forma di terapia, entru in un altru universu è scappu da u nostru. Sò completamente in a mo storia, a campu, ch'ella sia una nuvella o un rumanzu. Sò naturalmente ottimista è scappà, hè esce di a vita d'ogni ghjornu, andà versu à d'altri orizzonti è dà vita, mentre a scrittura, à e persone chì aghju inventate, ùn possu micca di caratteri, perchè ste persone diventanu quasi vere. Capià le quandu aghju messu a parolla "fine" à una storia hè orribile perchè chì mi sò attaccata à elle. Mi ci vole appena di tempu per esce ne.

Di marzu di u 2020, aghju approfittatu d'un pianu di partenza volontaria da Air France pè cunsacrà mi pienamente à a mo passione è à quelli chì mi sò cari. Di dicembre di u listessu annu, avia digià publicatu u mo primu rumanzu autoeditatu, intitolatu « U Palazzu San Cristóbal ». Stu rumanzu, chì face parte di u generu "mommy porn", conta una storia d'amore è di sessu trà una giovane vignaghjola corsa è un stagiuneru montenegrinu. A storia chì si passa in i belli paisaghji di a Corsica è di a costa di u punente americanu, offre un mischju affascinusu di passione, di rumanza è di misteru.



Da tandu, aghju cuntinuat à scrive cun affannu. Aghju scupertu diversi generi è stili, pruducendu assai raconti, sia in francese sia in corsu. Issi testi sò stati publicati nant'à i siti di l'Éditions Albiana è Interromania di u CCU di l'Università di Corsica Pasquale Paoli, permettendu mi di tuccà un publicu più largu è di sparte e mo storie cù passione.

U mo ultimu prughjettu hè un rumanzu negru intitolatu "Marilina", surtitu di dicembre di u 2022. Coeditatu da l'edizione Albiana è u CCU di l'Università di Corti, stu libru scrittu in lingua corsa porta i lettori in u fondu di l'anima umana à traversu à a storia d'una erotomana. Hè un viaghju scuru è intrigante chì sò felice di sparte cun voi.



In più di i mo rumanzi è di e mo nevelle è testi, aghju ancu imaginatu oraculi in lingua corsa, aghjunghjendu una dimensione spirituale è mistica à a mo opera literaria.



Scrivu soprattuttu in lingua corsa, micca per militantismu, ma perchè chì per mè, parlà a mo lingua materna è pudè parlà di tuttu in lingua corsa significa perpetuà un patrimoniù riccu trasmessu da i nostri antenati.

V'invitu à scopre u mo universu affascinante, induve l'amore, u misteru è a passione si scontranu in armonia. Per via di i mo scritti, vi offru una sperienza di lettura cattivante è indimentichevule.

Vi ringraziu d'avè mi letta è mi trica di fà vi scopre u mo universu è e mo pruduzione !

INTERVISTA À L'USU PROUST

1. Quale hè u vostru sognu o aspirazione maiò ?

Chì l'amore sia a priorità in a nostra vita.

2. Quale trattu di caratteru vi piace u più in una persona ?

A bravezza senza pretesa.

3. Quale trattu di caratteru odiate u più in una persona ?

L'ipocrisia.

4. Quale hè a vostra qualità principale ?

A bravezza, a creatività, a mo imaginazione...

5. Quale hè u vostru difettu maiò ?

A mancanza d'assicurazione in mè stessu, u sindromu di l'impustore.

6. Quale hè u vostru più grande timore o ansietà maiò ?

A pagina bianca !

7. Quale qualità cercate in un amicu vicinu ?

A lealtà.

8. Quale hè a vostra occupazione o attività preferita ?

Scrive, leghje è cucinà...

9. Quandu è induve erate u più felice ?

Quì è avà.

10. Quale hè u vostru più grande rigretu ?

Invechjà.

11. Quale u vostru libru preferitu è perchè ?

Pò parè sorprendente, perchè chì sò di più « thriller » ma hè u rumanzu « Et si c'était vrai » di Marc Levy perchè chì sta storia parla assai à a mo spiritualità è m'hà permessu di capisce è di vede tutti i segni chì l'Universu manda.

12. Quale sò i vostri eroi preferiti in a fizione ?

Miss Marple.

13. Quale hè a vostra canzona preferita o pezzu di musica è perchè ?

"Adagio" d'Albinoni interpretatu da Lara Fabian. Ci hè qualcosa di misticu in issa musica chì parla à u mo core è à a mo anima è per quessa, mi tocca particolarmente.

14. Quale ghjè u vostru locu favuritu in u mondu è perchè ?

Per via di u mo travagliu à Air France, aghju visitatu parechji lochi in u mondu, ma u mo paradisu hè è serà sempre a piccula marina di Scala, in Canari, u paese induve sò nata è induve aghju un "magazinu", una casuccia di piscadore, chì u mo babbu hà battizatu "Loin du boulot".
Quando sò custì, hè cum'è s'ellu ùn esistia più nunda, cum'è s'è era tagliata da u mondu è da a realtà. Quando sò custì, guardu passà u tempu è ascoltu u silenziu solu nannatu da u rumore di l'onde. In più di què, hè un spaziu chjucu-chjucu, ma assai federativu, chì attira tutti quelli chì tengu cari è chì venenu custì à sparte una stonda di cunvivialità, cum'è i mo parenti l'anu fattu prima.

15. Quale hè a vostra citazione preferita è perchè ?

"CARPE DIEM" perchè chì ci vole à osà ogni ghjornu riparte à cunquistà a so vita. A vita hè avà, u passatu ùn esiste più è u futuru ùn hè ancu ghjuntu.

16. Quale ghjè a vostra parolla favurita ?

Magia, perchè chì a magia hè in ogni locu, à chì sà vede la.

17. Quale hè a vostra più grande realizzazione in a vita fin'à avà ?

I mo figlioli prima di tuttu è dopu, avè scrittu dui rumanzi, perechje nuvelle è una pezza di teatru, avè fattu un tarocchu è oraculi.

18. Quale persona, viva o morta, ammirate u più è perchè ?

Prima u mo maritu perchè chì hè a mo forza è quellu chì crede in mè u più. Ghjè u mo primu lettore è in più leghje nantu à pagine chì, per fortuna, sò sempre numerate ! Perchè chì più d'una volta cascanu in terra...

Dopu u mo caru professore Ghjacumu Thiers co cunnoscu da più di quarant'anni è ch'aghju ritruvatu à issi attelli di scrittura. Dapoi hè u mo lettore in lingua corsa chì m'aiuta à l'ortografia, chì ùn sò micca una bona eleva !

19. Quale hè a vostra più grande speranza per l'avvene ?

Cuntinuà à scrive.

20. Quale ghjè u vostru caratteru principale ?

U bisognu d'esse amata.

21. Se puderate cambià una cosa in u mondu, chì saria ?

L'odiu, e guerre, u razzismu... Ci vole à creà un egregore d'amore !

22. Sè Diu esiste, chì vuleriate, dopu à a vostra morte, sente lu di vi ?

GRAZIE. Ti ringraziu per avè esistitu, grazie per esse stata quella chì eri.

23. Cosa abburrite di più ?

U puliticamente currettu, u panurgismu, a mullessa di mente, u cunfurmismu, i scatuli è i dogmi. U prugressu chì ùn si pone micca e dumande ghjuste. E persone chì pensanu chì un'avanzata tecnologica o medica hè necessariamente bona è chì un passu in daretu hè necessariamente male.

24. Quale hè u rigalu di a natura chì vuleriate avè ?

Mi piacerebbe scrive abbastanza bè per scrive assai di più libri...

25. Cumè vi piacerebbe à more ?

Strana questione... Pensu chì mi piacerebbe à more cum'è quelli dui vechjetti in u filmu Titanic à a fine, quandu l'acqua invade a barca. Sanu ch'elli ùn sopravviveranu micca, è tandu si stendenu nant'à u so lettu, abbracciandu si forte-forte. Morre in e braccie di quellu chì tengu caru mi pare ideale.

È u megliu seria chì muressimu à tempu, di vechjaia, cusì ùn simu tristi à stà ci ne unu senza l'altru !

26. Cumu vi videte da quì à 10 anni ?

Campu u presente, dumane ùn esiste micca.

27. Avete sempre vultu esse autrice ?

M'hè sempre piaciutu à leghje da quandu mi ricordu. A mo mamma mi dicia ch'avìa sempre un libru in manu. Aghju avutu l'occasioni di participà à attelli di scrittura organizzati da a merria di Bastia di ghjennaghju di u 2020 è hè ciò chì m'hà fattu principià. È da tandu ùn aghju micca firmatu...

28. Cosa hè chì vi hà datu voglia di scrive ?

Duranti issi attelli di scrittura, aghju cuminciatu cù piacè à cuntà storie è mi sò avvista chì n'avìa assai à cuntà !

29. U primu libru chì avete publicatu ? U so titulu ? A so casa editrice ?

Hè un "mommy porn" intitulatu U Palazzu San Cristobal chì aghju autopubblicatu nantu à Amazon.

30. Per voi, u mistieru d'autrice hè una passione o un travagliu ?

Hè soprattuttu, una passione, dunque s'ellu ci sò un ghjornu i lettori, perchè micca fà ne un mistieru ! Ma una professione-passione !

31. Da quantu tempu scrivite ?

Quandu avia 16 anni, aghju scrittu un rumanzu di "fantascienza". Aghju veramente principiatu à scrive in u 2020.

32. Avete d'altre passioni oltri à scrive ?

Mi piace a cucina, a fotografia, a lettura di sicuru, ma ancu u disegnu è a pittura. In fatti, tuttu mi passiona...

33. Cumu avete l'idee ? Da induve vene a vostra ispirazione?

L'idee mi venenu spessu quandu sò in lettu, a matina quandu mi svegliu prima di alzà mi, in stu statu di meza-cuscenza. Un avvenimentu, l'attualità o una parolla chì s'hè stampatu in u mo capu è chì mi face pensà à una storia. Què hè a fasa d'ideazione. Pigliu note nantu à fogli, libretti o quaderni, ci n'hè in ogni locu ma mi ritrovo perfettamente in u mo disordine. Dopu vene a fasa di scrittura, intensa, in ogni ghjornu, tutta a ghjurnata. Hè una cuncentrazione

immensa ma aghju digià a scena in u mo capu, hè cum'è un “puzzle” è aghju da piazzà i pezzi boni in u locu ghjustu.

34. Scrivite di più nantu à a carta o nantu à l'urdinatore ?

Mi piace a relazione sensuale di a carta è a penna. Ma mi “rompe e stacche” d'avè da trasfiriri tuttu nantu à l'urdinatore dopu. L'ispirazione vene à mè in un modu o l'altu.

35. E vostre storie sò basate nantu à avvenimenti veri, staltatoghji persunali o imaginazione ?
E storie venenu tutte da a mo imaginazione ancu s'elle portenu in elle appena di mè, ogni volta, ma ùn c'hè chè u mo maritu per vede la. Quandu scrivu credu chè hè a mo ànima chè parla.

36. Quandu scrivite, cunniscite a fine prima di scrive ? O impruvvisate mentre scrivite ?

Di regula, aghju a trama di a storia chè scrivu. L'idee ponu cambià mentre scrivu, ma l'idea generale ferma. Tandù faciu leghje à u mo maritu chè sempre mi dà cunsiglii boni.

37. À chè mumentu di a scrittura vene u titulu ?

In generale, vene à mè prima di scrive u pianu.

38. Cosa scrivite d'altu chè rumanzi ?

Scrivu soprattuttu nuvelle in lingua corsa.

39. Quale libri avete publicatu ?

U Palazzu San Cristòbal in u 2020 è Marilina in u 2022.

40. Avete un'idea di a vostra prossima storia ?

Aghju tante idee chè mi giranu in u mo capu !